

晚清名儒年譜

陳祖武先生選
清人年譜系列

◎本社影印室 輯

◎北京圖書館出版社

陳祖武先生選
清人年譜系列

◎本社影印室 輯

◎北京圖書館出版社

晚清名儒年譜

⑬



第十三冊目錄

湘綺府君年譜(王閔運)	六卷	王代功編	一
鄰蘇老人年譜(楊守敬)	一卷	楊守敬編	三四九
梅郎中年譜(梅曾亮)	一卷	吳常焘編	四四七
孫猶廩先生年譜(孫詒讓)	一卷	宋慈哀編	四五三
孫詒讓年譜(孫詒讓)	一卷	朱芳圃編	四六五
皮鹿門年譜(皮錫瑞)	一卷	皮名振編	五六九

湘綺府君年譜第一卷

長子代功述

府君姓王氏諱闔運字王甫湖南湘潭七都移風鄉常安里人也王氏之先與周同祖唐定郡望爭稱太原湘潭七都爲明三十九都地舊譜云自山西避兵至贛州復遷衡陽西鄉居數世當嘉靖中遷湘潭城外黃龍巷又云遭楊應龍之變乃避贛越二世遷衡陽新譜云楊應龍反播州在萬厯初王氏至湘潭已二世矣避兵雖非應龍而相傳有播州亂疑本貴州人也據舊傳及明時墓石推攷其年遷潭當在明孝憲時始遷祖曰東山

府君五傳至朝僑字惠人居石泥塘田過萬畝歲積穀
錢無所用直剗大竹盛之委階庭間當是時湘潭繁富
甲天下吾家亦極盛於此時惠人君有子五人並有才
執第四子中傳字石泉性澹靜不營世事以詩酒自樂
居許家橋昆弟煊赫爭以豪侈相尙閉門守靜寂如也
有子二人長曰之駿字適齋性穎敏弱冠入縣學當乾
嘉之際民物盛滿穀賤貨貴富家不能節則稍衰敗昆
弟六家唯適齋君田宅未損諸家欲賣田則責令強受
之無錢則舉債以應遂大困未二十年已田宅亦斥賣
略盡乃棄鄉居遷省城買屋三椽於善化文廟旁小巷

家世名醫以術治疾貧者不取錢且施以藥名乃大起
姻黨歸其盛德欽其宿學識李文恭於孤貧曰此非寒
生也後輩名者如賀尙書長齡毛西垣國翰黃虎癡本
驥皆執弟子禮年七十以壽終配戴夫人江蘇句容人
南澳同知諱志達之女生二子長諱士璠字奐若次諱
麟字步洲府君奐若君之次子也

道光十二年壬辰 十有一月辛丑府君生

十一月二十九日午時生於善化學宮巷內居室先

夕祖妣蔡夫人方坐庭中見流星墮地光芒照室驚

異之入室而作次日生府君

此事代功聞之從祖父步洲君之側室羅氏羅

時與祖妣閒話親見此異故言之特詳

廣額修眉方頤後耳有異常兒

時家貧甚五月中遭曾祖考適齋君之喪曾祖妣戴

夫人年已七十祖考奐若君輟學爲賈從祖父步洲

君授徒自給歲入僅數十千祖妣蔡夫人竭力經營

克勤克儉故家無廢事且時贍給族姻祖妣初生一

男元殤至是生府君曾祖妣七十乃見孫倍愛憐之

道光十三年癸巳 二歲

十二月葬適齋君於善化南門外一都二里牌林子
衝是爲吾家墳墓葬長沙之始

道光十四年甲午 三歲

府君幼穎悟祖妣教以古歌謠及唐五言諸詩卽能
識字曾祖妣喜曰此兒他日必成名惜余不及見耳

道光十五年乙未 四歲

道光十六年丙申 五歲

道光十七年丁酉 六歲

二月十六日祖考奩若君卒府君哭泣如禮有若成

人是歲患病危篤及愈體羸弱足不能過門限曾祖妣保抱扶持日以白朮餌之病始有瘳 十月祔葬
奐若君於林子衝

道光十八年戊戌 七歲

善化李鼎臣先生設塾里巷曾祖妣以其距家稍近
命府君從讀授以論語孟子朝往夕歸道中羣兒或
戲侮之府君一不與較識者已知爲大器矣

道光十九年己亥 八歲

仍從李先生讀

道光二十年庚子 九歲

是歲畢誦五經能屬文時姑家子郭正齋新楷少有神童之目亦少孤居省城兩家族黨過從者咸敬異焉

道光二十一年辛丑 十歲

始學時文帖括家貧不能延師曾祖妣乃命府君從步洲君讀並授作文之法

道光二十二年壬寅 十一歲

道光二十三年癸亥 十二歲

四月十五日曾祖妣戴夫人卒府君幼依祖母自過齋君卒後家益困始將學宮巷居宅斥賣營葬遂僦

屋而居是歲步洲君假館宜章縣署府君從之游學
益厲志於經史詞章昕夕不輟

道光二十四年甲辰 十三歲

道光二十五年乙巳 十四歲

道光二十六年丙午 十五歲

是歲僦居楊家花園時步洲君歷年應州縣書記之
聘來往無常府君從游不便因命居家侍母時家中
無書省城求書亦至艱往往展轉假借擇要鈔讀當
是時天下方驚於科舉宣宗允重翰林以一童生不
數年可躋二品故父老以科甲督責子弟甘心不悔

府君不喜制舉之業嘗假得楚詞讀之驚喜塾師目
爲襍學禁止勿觀府君則於作文時竊誦之塾師出
不意從後掣其卷藏焉蓋當時風尚如此府君益發
憤欲並古之作者尤欲多讀未見書且自恨孤陋遂
一意於取友

道光二十七年丁未 十六歲

始就外傳從劉先生煥藻讀書三卡同學七人始識
長沙羅伯賡熙贊羅丈通博有文名故識武陵劉采
九鳳苞劉丈居城南書院爲肄業生院長陳堯農先
生本欽鄧辛眉丈繹妻父也與鄧彌之丈輔綸俱居

院中府君與羅丈論詩羅言及二鄧府君欲訪之未暇也

道光二十八年戊申 十七歲

讀書營盤街戴祠始應童子試鄧丈彌之兄弟聞府君月落夢無痕詩句奇之特來造訪其時李丈篁仙壽蓉丁丈果臣取忠龍丈皦臣汝霖皆居城南院齋府君因定交焉李丈放誕自喜尤擅才名與府君相得甚懽日夕過從嘗於十二月雪夜李丈徒步來宿書室刻燭聯句二十韻名篇劇韻傳誦一時名字漸達湖外府君因城南交友之盛遂移家城南定入院

讀書之計

道光二十九年己酉 十八歲

肄業城南書院院長陳堯農先生工制藝每聚諸生
講學非高材生不得入內聽講陳先生因府君雋異
特許入內齋每有問難輒驚老宿長沙熊雨臚先生
少牧以孝廉名動海內詞賦科舉爲一時之冠因事
被議與朱丈宇恬昌琳居址相近朱丈特介紹府君
問業熊先生選文四十篇屬府君熟讀未數日復往
請益熊先生怪之因問文家派別府君具道其所以
應答如流不失一字熊先生歎曰子能自得師但勤

精研無負期望退而告人曰吾生平未見此才不獨
吾當讓出一頭地卽古來作者恐亦當退避三舍矣
自道光二十六年湖南瀕湖圍田水災後復連年
水旱是歲東南各直省復大水飢民入長沙者數萬
新甯土匪李沅發因連歲饑饉聚黨倡亂殺知縣據
縣城擾及廣西邊境廣西亦因旱飢民日思亂於時
承平日久自廣東燒煙事起宣宗尤畏疆臣生事故
各省大吏均以鎮靜爲主諸生肄業者猶謹守臥碑
聖諭諸訓不敢論列天下事雖亂象已成而士子欣
欣鄉學湖南風氣頗與道光初年異矣

道光三十年庚戌 十九歲

三月應縣試知縣李寅菴先生春暄拔置第一提督學政爲車公順軌取入縣學發落日以府君文不合式爲訓而獎掖備至聞者異之 是歲因丁丈果臣始識彭砥先丈嘉玉彭君習三禮於國朝言禮諸家學派最精又喜言兵法居長沙城中默然無聞亦不與時輩交遊府君一見與語大說遂有志於習禮每講論輒移晷達旦又手鈔史記成帙日夜讀之蓋自是始欲通經致用非僅詁訓詞章而已

咸豐元年辛亥 二十歲